



STINAPA TA INFORMA

BALANSA

Su trabou ta un di su hòbinan. Pero ademas di su funshon komo direktor di kuido na Fundashon Mariadal, Godfried (Boy) Clarendal gusta baila, wak deporte i partisipá den karnaval. El a siña apresia e naturalesa boneriano despues ku el a yega foi Europa. “Nos tin flornan masha bunita i frutanan ku na Europa nan ta yama ‘eksótiko’. Pero ku ta alabes saludabel”. Komo ilustrashon Boy ta mensioná: patia, milon i papaya. “I nan tur ta krese den kurá mes!”, e ta bisa ku orguyo. Tokante e founa boneriano, tambe e tin hopi di gaba: p’e e ta úniko. E ta nombra warawara, kinikini, lora i paranan di laman komo animalnan úniko den nos naturalesa. Segun Boy hopi biaha nos mes no ta realisá e balor di nan. Por ehèmpel nos por nota kon e warawara ta deshasí di kadavernan di bestia morto den naturalesa. E balor di e lora pa nos naturalesa ta su bunitesa i e echo ku e ta protehá ta un prueba ku su balor pa nos naturalesa ta grandi. Pa Boy ta masha fásil pa indiká kua ta su lugá favorito na Boneiru: TUR KAMINDA. E ta gusta e awa fresku, klaridat di solo i e echo ku e por sinta tòg den fresku. Boy ta mira e relashon entre naturalesa i nos ekonomia masha kla mes. Turismo ta e fuente mas grandi di nos entrada i ta pa e naturalesa e turistanan ta bini. Ademas, tin hende ainda ku ta ‘self-supportive’, pues ku nan ta biba di kosecha di kunuku. Su mensahe ta klaro. “Bo ta tende hopi biaha ku Boneiru ta limpi, pero tòg tin hende ta hasi ainda kosnan ku no ta kuadra ku maneho di gobiernu.” E ta duna komo ehèmpel e tiramentu di plèstik den naturalesa. Boy ta sigui splika ku e plèstik aki no por ser prosesá dor di naturalesa. Tambe e ta haña un lástima ku no tin sistema di resiklahe (ainda) na nos isla pa ku bòternan di plèstik. E ta konsiderá ku tin un liña masha fini entre naturalesa i medio ambiente. Nos naturalesa ta a base di medio ambiente. E kier pa nos tur mantené e balansa. I e ta terminá ku e pensamentu positivo ku nos tur huntu lo logra mantené e balansa aki tambe. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru